

四庫全書

集部

欽定四庫全書

文苑英華卷四百十二

宋 李昉等 編

幕府一

副使

授王忠嗣同隴右節度副使制

孫 逖

門下隴右破吐蕃跳盪功專知節度行軍兵馬使游擊
將軍守右威衛翊府左中郎將賜紫金魚袋王忠嗣出

自將門習於軍政智謀足用材藝超倫頃在河隴備彰
誠節持兵所向料敵無遺挫其侵軼之師收其要害之
地念功斯在議賞攸歸宜復舊官置同正員乃同隴右
節度副使依前專知兵馬先有勲封並宜如故

授馬元慶河西節度副使制

勅雲麾將軍右驍衛將軍員外置同正員幽州節度副
使上柱國馬元慶名重武臣才優將畧有剛勇以制敵
能廉幹而成務河湟作鎮戎狄是虞既資攻守之術宜

佐軍州之任可充河西節度副使判涼州長史兼赤水軍副使仍都知兵馬使餘如故

授李正己青州刺史制

常袞

勅平盧淄青節度都知兵馬使權知節度副使事開府儀同三司試太常卿兼御史中丞上柱國趙郡開國公李正己蘊經遠之方有盡忠之節雅擅韜畧尤通政理任兼文武誠貫等夷海岱之間兵車所會嘉績明著雖淄其又實藉循良符節之寄允茲僉屬必能敬事愛人

以康流弊宜膺寵授用副分憂可使持節青州諸軍事
兼青州刺史餘並如故

授論惟清朔方節度副使制

勅銀夏綏麟等四州兵馬使同朔方節度副使開府儀
同三司前行銀州刺史兼御史中丞歸德州都督武威
郡王論惟清智謀沉果政理甄詳資忠之誠表於奉上
幹事之用聞於在公佐戎律以成師布藩條而訓俗翟
土開闢圓陰底寧威懷相濟聲實惟允晉之北鄙地即

隰州介于河汾當此會要憂分式遏實藉良能宜兼中
憲之榮式寵外臺之寄可使持節隰州刺史兼御史中
丞歸德州都督克本州團練守促使同朔方節度副使
散官封如故

授王智興檢校右散騎常侍兼御史大夫克武
寧軍節度副使領本道兵馬赴行營制

白居易

勅沂州刺史御史中丞

集作大夫

王智興李愿李愬之鎮武

寧也汝為裨將勵節忘身濟成大功汝實有力獎其成
効擢授郡符海沂之間尤著聲績宜加新命以寵舊勞
仍提銳師往副戎律夫將之撫衆如子弟則衆之視將
如父兄苟推赤心而無疑必蹈白刃而不悔勉親士卒
佇剪寇戎可依前件

授薛廷範淮南使制

崔 嘏

勅考功郎中薛廷範等吾命重臣往鎮淮海其所選署
賓僚得以參用朝列伊爾廷範為時所聞可昇天子之

堂早入賢侯之幕周旋不忘於中道出處必踐其正途
輟茲考績之能俾倅戎旃之盛爾能以事君之道以奉
帥則無往而不適矣惟攷與球皆郟之舊僚也能以通
方佐成茂績至今庸蜀人多懷之至於叅佐計司主領
院務統兩地之推筦專五銖之鑄造各從其請以展良
能勉副已知用光所舉可依前件

授盧戡桂州副使制

勅前江陵縣令盧戡等藩方之命案寮雖得以上朝廷

亦擇其可者而授之至於昇副車首賓席自非賢才孰
允佳選戡尚義有聞積學多識去於榮進樂在閒放以
是為請宜乎得人由山立而下或以吏能發為官業或
以詞藻蔚彼雋髦各從所適之宜以廣用一作用人之
路銀章赤紱耀彼華筵可依前件

授鄭齊之靈武副使制

朕以靈武重鎮控制西戎故選於和門付以油節思得
幹用以佐叅畫如聞齊之自得科名留心政術奉沙漠

之使佐推筦之司口不告勞人稱奉職某與思謙臨洎
思退皆鑽研文學承襲軒裳暢彼聲光端其操履是可
以佐樽俎於台席奉指教於才臣而八達九衝曉巡夜
警亦執金吾之重務也咸允章奏無忝所從可

授公興鎮州副使等制

前人

勅大厦將構必藉良材雲幕既開是資髦士况易水居
常山之北容川當桂嶺之南惟是徐方俱為重寄凡所
選用誠皆得人爾等或以文學進身或以簪纓襲慶勉

思公舉無忝嘉招至於佐戎幕而靜轅門輯政刑而撫凋瘵亦副車之任也正即命服吾豈恡焉可依前件

判官

授王師魯等嶺南判官制 元 稹

勅王師魯等古稱南海為難理蓋蠻蜒獠俚之襟俗有珠璣瑇瑁之奇貨為吏者不能潔身無以格物是以非吳處默之清德不可以耀遠人非孫子荆之長才不可以叅密畫爾等皆當茂選取重元戎更職命官各如來

奏可依前件

授鄭仁弼檢校祠部員外充橫海判官制

前人

勅鄭仁弼諸侯辟士古實有之近制二千石已上乘輅
車者則開幕選才由古道也仁弼等有勞叅畫重膺以
聞威等著稱詞華翻亦致請臺省茂膺兼命式示恩榮
無忘切磨用副匡益可依前件

授王陟監察御史克西川節度判官制

前人

勅王陟等列諸侯之賓者遷次淹速得與上臺比倫其
或饋餉務繁參畫禮重亦得輟自他職副其所求爾等
或以政聞或以藝舉守臣上請信不予欺各竭乃誠以
修厥績可依前件

授崔旣檢校都官員外郎兼侍御史充河東判

官制

勅崔旣等自元和已以集作來有大勲烈於天下先皇賚

予以保衡者時惟司空度度亦齊慄祇畏不自滿大慎
簡其屬毗于厥政惟既及銖咸在茲選是用輟我紀察
副其勤求惟爾敬玄舊由蕃服効誠于長議以序遷我
峩鐵冠晶晶銀印授之以往其樂所從可依前件

授盧夢監察裏行宣州判官制

前人

勅盧夢等宣城重地較緡之數歲不下百餘萬管幹劇
職靈鹽近戎分務簡僚不易宜稱爾等研究儒術脩明

政經勉慎所從以承其長可依前件

授張洪相里友畧山南東道判官制

白居易

勅朝議郎行太常博士上柱國張洪前瀛莫等州都團
練判官朝議郎兼侍御史內供奉上柱國賜緋魚袋相
里友畧等元翼以大節大忠焯聞朝野授鉞開府殿我
漢南而又求賢乞能以自叅貳則其賓寀宜有以稱之
故吾求俊造之英勲烈之胄達朝議而練戎事者與焉

今以洪之知國體奉家聲以友畧之富藝文飽軍旅兩
中是選合而命之優秩寵章無所愛惜時無今古代有
忠賢苟致吾元翼於羊杜間則有陟明之典在洪可檢
校尚書職方員外郎兼侍御史充山南東道節度判官
仍賜緋魚袋散官勲如故友畧可檢校尚書屯田員外
郎兼侍御史充山南東道觀察判官勲如故

授温堯卿等賜緋充滄景江陵判官制

前人

勅溫堯卿等今之俊乂先辟於征鎮次升於朝廷故幕府之選下臺閣一等異日入而為大夫公卿者十八九焉荆門景城南北大府而堯卿等或已叅軍要或方受徵書各命以官分試其事名秩章綬分而寵之夫千里之行始於足下苟自強不息亦何遠而不屆哉可依前件餘如故

授王師閔檢校水部員外郎充徐泗濠等州觀

察判官制

勅前徐泗濠等州觀察支使朝議郎殿中侍御史內供奉上騎都尉賜緋魚袋王師閔朕以師律授智興智興以軍書辟閔才既為知己用官不候滿歲遷所以使能而責明理也然則贊庶察安戎旅既命之後吾有望於爾焉勉副所從佇展來効可檢校尚書水部員外郎兼殿中侍御史充徐泗濠等州觀察判官散官勲賜如故

授路貫等桂州判官制

勅藩隅之重委以侯伯軍府之要掌在賓僚貫等以文

行修身以智謀從事佐廉問澄清之務撫華夷錯雜之人俾其乂安實在叅贊宜及寵命以光所從可依前件
授裴敞昭義軍判官裴侔義成軍判官各轉官

制

勅裴敞等昭義義成今之重鎮實藉賓介以叅謀猷而
二帥皆勤於奉公精於辟士度才而授職循序而請官
頗合所宜咸可其奏可依前件

記室

授崔鄘等澤潞支使書記制 元 稹

勅崔鄘鄭翱等近制藩府臣僚自軍司馬以下皆得選
任其良執事者所移異職而鄘等事懇以狀聞各以秩
遷毗于新邑勉爾誠志俾無尤違鄘可監察裏行充澤
潞等州觀察支使翱可協律郎充昭義軍書記

授姚元康等官充推官掌書記制

白居易

勅朝散郎行秘書省校書郎姚元康儒林郎試太常寺

協律郎鄭懿等益部浮陽皆大征鎮也文昌金畧皆賢將相也而能以禮聘士以職任才多聞得人咸樂為用况爾等籌謀文藻各負所長苟能贊察庶掌奏記孜孜不怠翩翩有聲慰薦褒昇其則不遠元康可試右武衛倉曹參軍充劍南西川節度推官散官如故懿可試左金吾衛兵曹參軍充橫海軍節度掌書記餘如故

授保大軍節度掌書記檢校右散騎常侍房仁

寶檢校禮部尚書充職制 錢 珣

勅具官房仁寶等國朝作相之重在明皇帝時以偉德
景躅布於史策者有吾太尉馬爾仁寶裔孫始以文進
不得其志無所成名今用賤奏符檄之才職居藩服乘
傳而至善達戎機思賢之心欲招後嗣春官假秩儒者
斯榮且激爾曹勉佐元帥可依前件

授朔方軍節度掌書記檢校刑部員外郎兼侍
御史李東序檢校司勳郎中兼中丞克職制

前人

勅具官李東序凡諸鎮陪臣至自其幕府者或計事言
功或舉職請命未嘗不召之便殿假以寬言且使鋪陳
皆見臧否爾能用儒術佐吾列藩敷揚可取於詳明條
貫必由於忠信嘉善之道增秩所宜乘寵而還永觀爾
類可依前件

授鳳翔節度掌書記范惟乂左拾遺賜緋充職

制

勅具官范惟乂等軍興以來四方之政益煩矣而負才

抱術之士參于武幄者吾嘗授之好爵用表嘉賓復勉其左右聽從始終同獎爾負才甚直抱術且深自有忠謀共贊戎畧故加寵於紱冕之上報勞於師旅之間爾其計事出言必公必信更圖保大無或告勞可依前件
支使

授裴詒監察御史裏行桂管支使等制

杜牧

勅前鄆曹濮等州觀察支使朝散郎試大理評事裴詒

等守臣有司上請諸士皆曰詒等士族之中有政事科名清廉公謹嘗經職守衆稱有才古人於一飯之恩尚有殺身以報之者况於知已得不勉之可依前件

推巡

授王搏檢校殿中侍御史充義成軍節度推官

制

劉崇望

勅王搏名以文舉祥以履光敬於交人善為知已銖鉞開幕台鉉奉藩方虛婉婉之籌乃顧翹翹之乘能不輟

我周衰之任樂爾漢相之徒建禮部郎官惠文御史敬
思寵數勉聲嘉猷可依前件

授柳傑等四人官充鄭滑節度推巡制

白居易

勅試太子司議郎柳傑等古者公府得自選吏屬今仍

古制亦命領征鎮者必先慎柬

集作禮聘

而後升聞矧鄭滑

帥承元輸忠伏順炳焉有大節於國奉其上蒞其下實
藉寮案以左右之而傑等或緣飾詞華或貯畜材行揣

摩思試以待已知宜振籌謀用光慰薦傑等可某官充
鄭滑節度推官巡官等

文苑英華卷四百十二

欽定四庫全書

文苑英華卷四百十三

宋 李昉等 編

幕府二

幕府共制

授韋審規西川節度副使御史中丞李虞仲崔

戎姚向溫會等並西川判官皆賜緋各檢校

省官兼御史制 白居易

勅西川

一有南字

曰益部地有險府有兵礙戎屏華號為難

理故吾命文昌為帥長俾鎮撫焉次命審規為上介俾
左右焉又命虞仲戎向會等為庶僚俾咨度焉進言者
謂文昌賢而審規輩以才佐賢蜀必理矣夫輟三署吏
贊丞相府假憲官職加臺郎暨一命再命之服以遣之
其於張大光榮四方征鎮之賓寮不侔矣爾等苟佐吾
丞相以善政聞使吾無一方之憂吾寧久遺汝於諸侯
乎爾其勉之可依前件

授李彤檢校工部郎中充鄭滑節度副使王源

中檢校刑部員外郎充觀察判官各兼侍御
史賜緋紫制

勅萬年縣令李彤侍御史王源中等舜以五長綏四國
若今之節制也周以十聯率諸侯若今之廉察也國家
合為一柄付有功諸侯故其陪臣選任益重或輟朝籍
授簡書者往往而有况承元有大忠於國受重任于外
使其承上蒞下敬始善終實在庶寮協力以濟今之以
彤宰京邑有理劇之用如水在器撓之不濁以源中立

憲府有糾正之能如刀發剗割之無滯一可以倅戎事
一可以佐輶車二職交脩在此一舉臺郎憲吏金印銀
章加乎爾身無忝我命可依前件

授楊景復檢校膳部員外郎鄆州觀察判官李
綬監察御史天平軍判官盧載協律郎天平
軍巡官獨孤涇監察御史壽州團練副使馬
植試校書郎涇原掌書記程昔範試正字涇
原判官等制

勅具官楊景復等士君子不患無位患已不立苟有所
立人必知之惟爾等六人蘊才業文咸士之秀者果為
賢侯交辟俾朕得聞其姓名是用各進其秩分授以職
若脩飾不已籌謀有聞則鴻漸之資當從此始而景復
稟訓祇命頗著令稱故因滿歲特假臺郎古者公臣之
良入補王闕朝獎非遠爾其勉之可依前件

授李石楊穀

集作穀
下同

張殷衡等官並充涇原判

官制

勅李石等用武之地曰涇與原合為一鎮控扼夷虜朕

授布鉞責其成功布即

集作乃

祇惕受命思有以自輔者

因上言石毅殷衡等學業才識堪置幄中分務列官咸
可其請而布憂邊甚切選士必精爾宜各竭所能為知
已用可依前件

授京兆府司錄叅軍孫簡可檢校禮部員外郎

荆南節度判官浙東判官試大理評事韓似

同

二字集作似下同

可殿中侍御史巡官試正字晁

朴一作韓杼可試協律郎推官制

前人

勅具官孫簡等凡使府之制量職之輕重以命官揆時之遠近以進秩俾等衰有常序遷次有常程則勞逸均而名分定矣簡自登憲司佐相幕既糾天府皆有可稱而似同等亦以文學發身謀畫効用荆揚淝左實藉賓寮况今之公卿大夫皆由此途出慎職祇事爾無自輕可依前件

授李承慶鳳翔節度副使馮軒義成軍推官制

杜牧

勅朝議郎前守太常丞上柱國李承慶等以文學升名於有司以才能入仕於官次諸侯辟之以佐於賓席天子用之以升於朝廷次第等級大小高下亦與古之鄉舉里選考功試言無以異也爾等皆吾卿大夫之令子弟也清風素範克肖家聲屬詞彤章能取科第既為知己皆為才人賢觀與遊達視所舉今爾賓主兩皆得之

義則進否則退無為美疹疑作疾以求苟容可依前件

授白從道東渭橋巡官陶祥福建支使劉蛻壽

州巡官等制

勅度支東渭橋給納使巡官將仕郎試大理評事兼監察御史白從道等朕以國計出入委於表臣尚書郎當戰伐之餘財穀殫蹙斷長補短以無為有今者上言三吏皆曰周才校其智能足應事役洎守臣貽孫等亦曰祥蛻文學溫慎可在賓階才者得失之端士者功名之

本勉於自勵無負知已可依前件

授盧藉河東副使李推賢殿中丞高湜湖南推

官薛廷傑桂管支使制

勅河東節度副使朝散大夫檢校大理少卿攝御史中丞上柱國盧藉等夫諸侯之任重矣其行道也得以阜俗變俗其行法也得以刑人賞人若張政化得以助業

一作宜得所助

某等上言咸舉可用藉等或負才氣倜儻不群

或以文章策名俊秀或有幹局可佐圉圉皆狗所請予

安能知并州追胡王業茲始艱難已來何戰不會長沙
始安頗聞旱耗各宜良士以佐賢侯夫直道枉道無他
故也取容盡節而已勿慮後患宜竭報知洎殿省佐僚
縣道為郡豈曰虛授亦當爾才正霜臺之高名班芸閣
之初命各服寵祿勉於自強可依前件

授鄭竭江西判官李仁範東川推官裴慶

集作處下

同餘山南東道推官處士陳威西川安撫巡

官等制

勅淞江西道都團練判官將仕郎監察御史裏行鄭竭
李仁範暨慶餘等咸以文行策名清時諸侯知之命為
幕吏少微四星處士毗輔之宿也天之布列在軒轅前
此乃天意親近賢良先於妃后威者吾能言之耕延陵
之臯荷石門之蓀沉如魚頰集作贊冥若鴻翔非吾賢相
爾肯起勉酬知己以壯在野並可依前件

授石賀義武軍書記崔涓東川推官等制

前人

勅朝議郎行秘書省著作佐郎石賀等朕寄諸侯之事
重矣大者教化風俗小者惠養黎庶環千里之疆綰三
軍之衆講求倚用不五六人守臣公度仲郢所請賀等
各以文學決科愷悌干祿觀其褒舉皆是一作有才名能
報所知能用可用在爾賓主予不與焉暨鑲與鈞亦稱
智敏神州作掾五庫掌財足展幹能無惰官守可依前
件

授竇回鳳翔節度副使崔澄觀察判官韓渥節

度掌書記等制

錢 珣

勅具官崔澄等漢詔子弟理郡國必擇諸儒有材行者以左右之故韓安國王尊之徒皆能守法相導炯然可觀而顯位高名終亦自得今朕以汧岐輿壤而輔京師推擇統臨重在藩邨用乃命丞相選賓介於朝而回以術業克官丞相先緒澄以禮義端已實稟天成渥致用於文甚多強力舉是三美濟于一方苟務同心必聞善政吾欲保任親戚表率諸侯往贊理聲日當傾聽爾等

亮直勤敬如在諫省郎署時則安國王尊之賢與古相
望遷秩命服誠未足多可依前件

授保大軍節度判官鄭晦朝散大夫檢校工部
尚書觀察支使劉源長檢校刑部郎中節度
推官張道樞檢校祠部郎中觀察推官韓伎
檢校工部員外郎招討推官高頎檢校水部
員外郎並充職等制

勅具官鄭晦等吾廊時帥臣盛有忠力於王室其所以

輔成勲烈者蓋俎豆之設召置得人言善必行計竒必用而爾等克荷代祿載揚家聲或端敏有為學術自飾尊獎之志斯不忘於善言竒計之聞信有輔成之道爾故八座諸郎銀章朱紱加於幕府遂被薦聞更推共濟之誠茲亦未多之寵可依前件

授同州防禦判官崔洎充節度判官長春宮巡官郭璘充掌書記防禦推官王承雍充節推等制

勅具官崔洎等朕以左輔雄近復加節制之權而帥臣
舉彼賓寮分其授任且聞洎等各抱美材見善必遷存
誠甚直每竭用長之智以匡保大之謀郎署金章吾又
何愛噫論兵有略為政有經叅佐不渝寵光自至可依
前件

授前河中府少尹張處休加檢校郎中靜海軍
節度副使沈琮檢校員外郎充職裴綽澠池
縣令蔣粉臨留縣令等制

勅具官張處休等夫以忠謀直道佐諸侯之善以一方而致其誠節卒歸王室者則陪臣得其職矣於慎獄勸農便百姓之欲而利一邑則令長得其官矣爾等博達吏道善事知己而處休以文學自進枌於勲緒有承閱拔嘉杼遂可其奏皆用訓汝爾其圖之可依前件

授攝淮南觀察支使田光嗣檢校郎中充職李
潛嶺南西道觀察支使長蘆縣令房殷蕪侍

御史等制

勅具官田光嗣等從事之任卒以策一作籌謀文翰往叅
諸政能則政舉否則政墮故有慘舒繫乎能否安得以
一談一笑媚於所從維揚控淮海之會邕南雜夷僚之
居各引良材往佐其理而光嗣潛殷之善必有以稱其
授聘者咸來被寵無忝爾知可依前件

授張道蔚朔方節度供軍判官隴州防禦推官

李融弘文館校書郎充職等制

劉崇望

勅張道蔚等糧餉其軍防虞所理况自邊徼必資強能
是命擢以校文寵茲佐略宜思績効無忝從戎可依前
件

高銳奏從事陳璩等三人授官制

前人

勅高銳等既以勤心定賓主之分宜頒嘉命為官屬之
榮同叅執法之司勉副知人之地期將盡力共贊成功
可依前件

加外藩佐僚郎等將制

勅具官某等或游徼罷居堙鬱彈冠之望或指揮効用周旋免胄之行幹以奉公恭而事上允當選舊亦既賞勞禁旅親營實在將軍之令雄藩武帳宜增列校之威各命寵遷勉成茂績驟升郎佐無忝官榮可依前件

幕職趙儒等加官制

薛廷珪

勅具官趙儒等或以言罷兼官或以來陳厥貢俱懷吏幹思振宦途即俞所陳各徇其請珥貂佐郡咸謂殊恩

宜思舊章往佩殊寵可依前件

授溫潞湖州防禦判官李壇湖州防禦推

一作判

官霍銖絳州翼城尉等制

勅具官溫潞等以潞常佐元戎有聞東魯會計叅畫聲猷藹然以壇宗室菁英詞場秀造撫青雲而抗足丁艱運以隱鱗跡滯江湖價高甲乙方從梗泛言奉弓招贊我勲賢開其淹恤而銖亦以將命頗謂有勞俞其奏章各俾序進星郎侍史洎尉于縣屬者服我恩命各宜勉

之可依前件

授澧朗團練副使徐罕檢校郎中賜紫奚承弼

鄆曹判官制

勅具官徐罕等通材應聘利刃從軍贊畫允臧吐茹得
所伸於知已達我聽聞今朗陵汶陽方纏兵革式佇和
寧之報尤資樽俎之謀星郎柱史洎紫金之命則俞其
奏薦各懋寵光勉酬所知共偃兵革無屑於蚤暮也可
依前件

授攝澤潞副使詹承麋檢校尚書充職嶺南東

道供軍判官李谷檢校郎中嶺南東道節度


判官鄭商郎中賜緋制 李 璣

勅詹承麋等上黨南越俱名鎮也倅戎餽運皆重職也
以承麋等並以才業達於帥臣正位加官各從所請可
依前件

授楊詔嶺南東道節度供軍判官張薦節度判

官楊郜支使制

勅楊詔等幕吏之選委之將帥尚矣况元勳大臣而付以嶺表之重者哉詔等或以本官任職或加繡衣白筆之號皆從其請噫以南越之雄富類東閣疑之招延爾豈直陟金階一作躡珠履而已勉贊策畫無惑盃觴報恩酬知於是乎在可依前件



文苑英華卷四百十三

欽定四庫全書

集部

文苑英華卷四百十六
四至

詳校官庶吉士臣柳遵祖

助教臣常循覆勘

總校官進士臣朱鈐

校對官中書臣鮑之鍾

謄錄監生臣許紹錦

欽定四庫全書

文苑英華卷四百十四

宋 李昉等 編

上佐

長史

授張元福勝州都督府長史制

李 嶠

鸞臺寧遠將軍守右衛彭池府右果毅都尉張元福素
閑武略兼有吏能荷戟臨戎屢陪蒼兕之陣題輿撫俗

庶清白羊之黨可朝議大夫行勝州都督府長史仍馳
驛赴任主者施行

授陳璲涼州都督府長史制

鸞臺刑部司馬上柱國陳璲知足禦戎才堪理劇題輿
趙北未展器能分乘河西佇清邊徼假以優命行觀成
績可朝散大夫守涼州都督府長史勲如故主者施行

授艾敬直仙州長史制

蘇頲

勅朝議郎守豫州司上柱國艾敬直恪勤官次精練文

法往持憲簡共憚清嚴頃擁使車旌別淑慝好龍遺迹
乘鳧舊壤俾州閭之創建佇邦國之誠謠可守仙州長
史散官勲並如故

授盧朔萊州長史等制

孫逖

門下朝散大夫行太原府太谷縣令容

一作任

城縣開國

子盧朔朝請大夫行太原府榆次縣令薛重輝等咸以
班列遷于令長雖恭所職或異其能工則度材人無求
備宜從近邑俾佐遠藩朔可行萊州長史重輝可行括

州長史散官如故主者施行

授楊行審靈州長史制

門下朝散大夫守涼州都督府司馬河西轉運判官柱
國楊行審雅推幹術兼有權謀頃在武威克脩官政類
能而舉宜增郡佐之秩從帥而遷仍統軍城之務可守
靈州都督府長史仍充六城水運使散官勲如故

授楊戩華州長史制

門下岐州司馬楊戩脩身自久從政亦淹凡所劾官皆

聞著稱三輔之郡貳職為難宜易務於汧岐俾遷榮於河華可華州長史散官如故

授韋景遠健為郡長史等制

門下益州蜀縣令韋景遠鄆縣令韋履言等各因常調俱在親人雖清白自持而方圓未適使者所奏應非百里之才官政式殊俾佐六條之職景遠可行健為郡長史履言可行仁壽郡長史

授楊進亳州長史制

元稹

勅楊進頃者師道潛遣兇徒將焚京洛姦謀指日忠告
先期俾無賴尾之災實賴赤心之効雖居禁衛未免食
貧言念前勞宜沾厚秩式佐郡府仍壯軍容尚旌撲滅
之功以示優崇之賞可守亳州長史仍令宣武軍節度
收隨要中驅使

授盧捷深州長史制

勅前成德軍節度巡官盧捷朕以鎮冀數州之地刑賞
廢置盡委之於弘正度爾才能宜為長佐且願兼榮允

吾台臣是用兩可饒陽大邑無陋厥官可依前件

授董昌齡許州長史制

白居易

勅將仕郎權知泗州長史兼殿中侍御史賜緋魚袋董昌齡頃為邑宰今贊郡符皆聞約已之名每展在公之節稽其器局允謂廉明議以稍遷用彰勤効可守許州長史兼侍御史散官如故

授楊孝直滑州長史制

勅楊孝直早以材力從戎冀方專習武經通知吏事承

元移鎮孝直實來詢謀驅馳有所裨助軍郡之佐寵秩非輕用答忠勞以明勸獎可滑州長史

授張嘉泰延州長史制

勅前丹州司馬張嘉泰一從戎旅多歷歲時奉職有勞率身無過軍郡長佐資秩不卑自丹轉延頗為優豫題輿便道往守乃官可延州長史

授柳師玄衢州長史國從瑜邢州司馬制

杜牧

勅夏州節度押衙知進奏朝議郎前權知杭州長史并
監察御史上柱國柳師玄等將軍護塞師玄主留邸之
職從瑜繼愆以墨線狗公喪葬告滿珪專書府叢委之
務咸有勞能遷獎正名亦其常也各宜專勤勿懼悔尤
可依前件

授賴師貞懷州長史周少鄜虢州司馬王桂直
道州長史等制

勅鳳翔府節度押衙知進奏銀青光祿大夫檢校秘書

監前蕪亳州長史殿中侍御史上柱國賴師貞等師貞
主大藩留邸之事少鄙專史閣錯雜之務皆公謹歲久
官次當遷玄爽俾佐郡符亦有可取湖外饑人相聚為
寇蕩覆鄉縣勢如燎火蓋不得已遂至剪伐桂直用命
一舉滅之言念功勤宜有褒賞名郡上佐帖以憲秩耀
爾軍旅可增義勇可依前件

授田密相州長史等制

崔 嘏

勅田密等並以才識聞於所知主帥上言計司有請各

從所便分以命之仍假憲官式彰優寵

授楊知權袁州司馬陳錫温州長史楊澄端州

司馬等制

錢 珣

勅具官某等凡臨戎有勇知其能為將成務有材知其能為吏然則有勇有材者置之不遷使其興旅食之歎非所以激為將勸為吏也各命敘升無忽吾典可依前件

授侯蘊贊善大夫李仁誨棣州長史蘇汾坊州

長史制

劉崇望

勅某官某等或以忠勤彰於侯正或以奏獻著彼勞能
況侯蘊李仁誨親奉禁營始陪輦路不有遷命將何勸
人可依前件

授鄜州判官王堅檢校兵部尚書王彥懷翟州

長史程佩思州司馬制

薛廷珪

勅迺眷雕陰仍歲征討厥土既堵

薄土也
秦昔切

其人用勞誠

節是圖貢輸無怠而堅等能奉連帥來為使臣不有超

昇孰旌優異五兵重秩式耀賓階下與夫進典午承郡
之榮者皆拔茅連茹之謂也可依前件

別駕

授李守一別駕等制

蘇頌

黃門皇三從兄前洺州司馬守一等自登官序並穆政
聲趙際燕陞漳濱淇上控河朔之風土盡山東之郡國
宜膺別乘往佐專城可依前件主者施行

授韋抱貞虢州別駕制

黃門通議大夫前行剡王府諮議叅軍事上柱國韋抱
貞早以才地久登班序清徽藹然素風罔墜頃遊朱邸
嘗寵於背淮俾驚緹軒往之於封號可依號州別駕散
官勲如故主者施行

授韋表玘泗州別駕制

黃門朝議大夫前行襄州司馬員外置同正員韋表玘
風韻融朗文詞富贍故得朝列著聞選曹甄擇漾流為
漢嘗籍美於珠臯泗達于河爰馳聲於磬水可守泗州

別駕散官如故主者施行

授張景順原州都督府別駕制

前人

黃門朝議郎殿中尚乘奉御兼隴右南牧使張景順襟
期俊爽識具甄明代嗣僕臣家傳馬政慎言且聞於舉
莢能養曾靡於缺銜惟在垌之可稱彼量谷之伊佇既
叶抽獎仍循職事可守原州都督府別駕餘如故主者
施行

授李踐由安州別駕等制

孫逖

門下朝議大夫前使持節房州諸軍事守房州刺史上
輕車都尉李踐由朝議大夫行蘄州司馬護軍李惟可
等出自士林頻遷官序或方圖疑異用道有變通或昆
友同官法宜迴避俾從新命用協舊章踐由可守安州
都督府別駕散官如故惟可鄂州別駕官勲如故

授李裕鄧州別駕等制

門下正議大夫前使持節海州刺史上柱國疑山縣

開國子李裕朝議大夫前使持節泗州刺史上柱國開國男魏滉等咸資舊德早踐通班頃坐微瑕因從免職賢哲之後可以勸能邦國之功期於補過裕可行鄧州別駕滉可守德州別駕勲封如故

授蕭誠弘農郡別駕制

勅朝請大夫南陽郡長史員外置同正員上柱國蕭誠早因才藝久踐榮班頃涉微瑕未為深累佐郡之職冗員頗多既有命於省官俾稍遷於近服可守弘農郡別

駕散官如故

授張正度汾州別駕等制

杜牧

勅中散大夫前守青州別駕上柱國張正度等各以才能入仕謹慎脩身積日累時咸有知己或有序進或徇所請皆佐別郡無怠官常可依前件

授王叔政洪州別駕制

崔嘏

勅前綿州刺史王叔政等罷專城之印題別駕之榮休摧虜之策遷計掾之任此朝廷所以舉才而振滯也政

緣吏昇珩以文進分符得理人之術佐賦有羨入之績
隨薦實來有司上奏爰因所舉各類所能厚祿高名無
忘効用可依前件

授魏州別駕張景裕等四人正授制

錢 珩

勅具官某等任人其難古有試可之說爾等為吏嘗試
於魏中矣今藩臣信正其秩是必有試可之材皆命與
之亦惟常典可依前件

授虞岫常州別駕溫羅濠州長史制

李 璣

勅虞岫等凡別駕長史務簡俸優故在京百司諸侯留
邸所以勸勤事之吏邸疑奉職之勞今以命爾等即循
例也可依前件

司馬

授杜從則雍州司馬制

闕 名

鸞臺中大夫檢校尚方少監杜從則體業端固器識通

敏驅策自久績効有聞作貳神州實資幹用兼司劇署
載佇公勤宜踐新榮仍兼舊職可雍州司馬兼知尚方
少監事主者施行

授吉義福等荊州都督府司馬制

闕名

鸞臺檢校河源軍營田游擊將軍守左衛杜陽府左果
毅都尉員外置上柱國吉義福等勤績兵欄効申田祖
五戎既戢萬庾斯殷宜輟掌於連營俾收功於別乘可

鄆州都督府司馬

授溫慎微揚州司馬制

蘇頌題

門下中散大夫守興州刺史輕車都尉溫慎微門遺清
白家傳詩禮外鳴謙而益光中造理而能密書工懸帳
賦掩馳輪閒達彰其起草仁明最于分竹乃睠維揚之
藩是稱重江之奧端寮所擇僉議攸歸可守揚州大都
督府司馬散官勲如故

授樊偁

總目作侃

益州司馬制

黃門大中大夫前守榮州都督借紫金魚袋上柱國樊
侶早負文詞累遷省闈頃揚才智受任軍州敏以邀功
斷而臨事峨眉作鎮鼈靈開國惟巴蜀之險接西南之
夷式遏撫循尤擇時望端寮副職俾承朝委可行益州
大都督府司馬餘如故仍知蜀川防禦副使即馳驛赴
任

授馮光嗣揚州都督府司馬制

前人

門下朝散大夫使持節黃州諸軍事守黃州刺史馮光
嗣忠信立名見推人物朝散大夫守相州別駕上柱國
鄭國公楊獻通明應務雅有吏能頃在中朝各登清貫
自居外郡頗聞政績連率之府貳職為難宜膺並命之
榮以副缺官之選光嗣可守揚州大都督府司馬散官
如故獻可守潞州大都督府司馬散官封如故仍並馳
驛赴任

授李廷珪沂州司馬制

孫逖

勅朝議郎行右領軍長史李廷珎爰以疇人遂居先職
不脩其任是曠於官歷象之司既非適用海沂之佐俾
効所能可行沂州司馬員外置同正員

授李庭芝絳州司馬制

門下行櫟陽縣令李庭芝行能通敏政術優長有士族
之令名是王畿之良吏在官既久成効則多宜佐雄藩
俾增榮秩可行絳州司馬散官如故

授梁炫郢州司馬制

勅潘州司戶參軍員外置同正員江南西道採訪使判
官梁炫才堪應物累則因人近佐澄清頗彰勤苦以茲
補過因可收長宜遷貳郡之榮式允連率之薦可郢州
司馬員外置同正員

授嚴正誨博州司馬制

門下朝散大夫行司農寺丞攝殿中侍御史專知太倉
出納使借緋魚袋嚴正誨頗有吏能累遷官守况所効
職必聞其政出納之吝或未當才邦國之功期於佐理

可博州司馬借緋魚袋如故

文苑英華卷四百十四

欽定四庫全書

文苑英華卷四百十五

宋 李昉等 編

宰邑

外縣令

授元素履忠州臨江縣令制 李 嶠

勅奉議郎行涪州隆化縣元素履綰銅兩穴遊刃三巴
府推其能人便其政賓寮戀仰蠻漢謳吟宜遂所祈以
終美績可忠州臨江縣令

授李承嘉并州太原縣令制

勅通議大夫前守文昌司勳員外郎李承嘉擢秀士林
昇榮禮閣公勤無怠幹制有餘既脩太原是惟舊國爰
製美錦實佇良材宜錫崇班佇聞異績可檢校并州太
原縣令散官如故仍馳驛赴任

授趙崇嗣南由縣令等制

勅朝議郎前行慶州同川縣丞趙崇嗣儒林郎守蓬州
寅縣丞陳義全等或典農朔陞致京庾之積或驅驛巴

徼有綏輯之功宜敘成勞俾無遺賞崇嗣可行隴州南
由縣令義全可守潼關今散官並如故

授竇慈遜岐山縣令制

蘇頲

勅朝議郎行司農寺竇慈遜爰以幹用歷登班秩憲曹
農府星籥未深雍時岐山絃歌所屬宜遷子男之邑佇
聞人吏之謠可岐山縣令散官如故

授畢懷亮清流縣令制

勅前常州晉陵縣丞畢懷亮踐言立行希高慕古弓旌

之禮方議於徵辟軒冕之榮每聞於退讓厥聲則遠斯道不渝須嘉賢良可鎮浮競遂其彭澤之志用表太丘之德可滁州清流縣令

授吳太玄宋城縣令制

勅朝議郎行監察御史吳太玄清以立身嚴以持法謠成避馬實憚於霜威政佇遷蝗俾聞於風教可行宋州宋城縣令散官如故

授王璪柳城縣令制

勅朝議郎前行營州都督府倉曹叅軍上柱國王璪早
聞幹用兼擅籌畫龍城達邑俾居銅墨之班鯨海安波
仍掌舳艫之事可行營州柳城縣令散官如故仍充海
路押運糧使

授陽洽安邑縣令制

黃門朝請大夫新除河南府司錄叅軍事陽洽慎則能
密清而又公任之養人特疑作時曰循吏朱鉤應務迹豈

滯於中京墨綬宣風才可臨於大邑可蒲州安邑縣令

散官如故

授于光庭聞喜縣令制

黃門朝議大夫前行鄧州長史上柱國臨淄縣開國男
于光庭早聞詩禮兼著詞學歷職有聲在公無撓宛潭
菊水未旌理劇之能漢邑桐鄉式佇宣風之最可行絳
州聞喜縣令散官勲封如故

授韋由太原縣令等制

孫逖

門下朝議大夫守太子中允韋由太常丞長清縣開國

男程若水等或業擅鄉族恩延將相或以人才累升官
叙北京理劇東朝駁議宜膺並命以叶類能由可守太
原縣令若水可守太子中允散官如故

授徐鈞南海縣令制

勅行晉州神山縣徐鈞幹以立身果於從政頻更所職
頗効其能言念遠人實資良吏既有使臣之薦宜遷宰
邑之榮可廣州南海縣令

授崔綸鄆縣令制

勅益州大都督府倉曹參軍崔綸頃為郡掾兼佐軍麾
清幹有聞公勤亦著名當歲調才應時須宜遷宰邑之
榮式允使臣之薦可益州郫縣令

授銀州刺史劉頗河中府河西縣令制

元 稹

勅劉頗朕以自邠而北夷夏雜居號為難理乃詔執事
求所以綏懷控壓之者皆曰頗在茲選且言其伐蔡之
役嘗參事

集作
軍非

於懷汝之師部分弛張允叶軍政遂命

試領州郡事衆果寧阜邊人宜之連帥以聞議請甄獎
河西近邑擇吏惟精無怯牛刀為我烹割可依前件

授齊煦崔諷等鄭縣剡縣令制

前人

勅前橫海軍節度判官監察御史裏行齊煦前衢州須
江縣令崔諷等今一邑之長古一國之君也刑罰紀綱
約略受制於朝廷大抵休戚予奪之間盡專之於令長
矣然而天下至大百吏至衆吾安能以一耳一目觀聽

其短長耶翻等皆奉詔條為人求瘼剡薦於爾豈其欺
予各勉厥誠以臻于理煦可華州鄭縣令諷可越州剡縣
令

授元公度華陰縣令制

白居易

勅元公度吾欲理化萬方故自近始前授太宗正翻印
綬使牧華人翻能副吾此心選吏責課言公度廉明有
守乞宰華陰噫華陰當道東西往來先是為邑者多飾
廚傳奉賓旅以沽名譽而不親吾人爾能革之足為良

宰敬長果法無慢乃官可華陰縣令餘如故

授薛元賞華原縣令制

勅前大理丞薛元賞旬服之制也樹以尹正承以令長
上下有統而理化行焉以元賞前為廷尉丞察獄平刑
頗聞敬慎寺卿奏課邑宰缺員故移欽恤之心使布惠
和之政上承爾長下字吾人無或越思而乖統理可華
原縣令

授辛弁文淄州長山縣令制

勅趙州臨城縣令辛弁文既有吏材又知臣節遁逃寇
難奔走道途言念忠勞宜加恩獎俾換銅墨移宰長山
可依前件

授裴克諒權知華陰縣令制

勅華陰令卒非選補時調租勉農官

集作政

不可闕前鎮

國軍判官試大理評事裴克諒久佐本府頗有勤績屬
邑利病爾必周知宜假銅墨試其材理待有所立方議
正名

授崔郁南鄭縣令等制

崔
嘏

勅前藍田令崔郁前登封令鄭倚前陸渾令李元夔前
京兆尹戶曹李廡等撫鰥憫奉陵寢本於廉白藉彼恪
勤爰因叅調之資是奉選求之命銓衡之下雖欲掄材
資品之間固難專授勉膺獎任無俾蔑聞郁可興元府
南鄭縣令倚可鳳翔府天興縣令元夔可莊陵令廡可
高陵令

授李瑤雲陽縣令等制

勅李瑤等京縣理劇綱曹糾違書殿讎校之清閒光祿膳饌之承副從容於蓮蓬之下籌畫於雲幕之間苟非才能不預斯選以瑤等或職任脩舉或文業優長用是披之寵光旌此休問各從其適無忝已知可依前件

授楊鎰西水縣令張廷濟永清縣令盧軫新政

縣令孫球下邳縣令等制 劉崇望

勅昔魏郡十五城獨繁陽有異政漢史書之以其為縣之才未易得也今我擇官憂人之際一朝以難得之才

待鎰等四子其何如哉將責試功亦宜申命為政如御
不可改轍而行為政如農唯在勤思其事無或窮人使
為盜也書稱以庸本朝旌賞遽以印綬光命之球蓋延
徐師溥之所舉乃為之酬當務其實可依前件

授楊弘範郿縣令制

勅楊弘範能以下位伸于上聞諒屬驅馳不避繁劇郿
大邑也有民人焉勉揚仁風無辱公舉可依前件

授薛璠新鄭縣令賈希弼汧源縣令李宰麟遊

縣令等制

勅薛璫等我聞焦贛之伺奸邪虞詡之推盤錯皆屏盜之迹為治縣之先盜既不興縣是用保今其時也勉思齊之其於政之善惡人之理亂賞罰甚明足以自擇璫得銀章無忘兢惕

授于荷雙流縣令制

薛廷珪

勅具官某等嗟乎爾荷丞相之子也栖遯府縣汨沒風塵美蔭成蹊孤根委地矧吾戚屬茲用軫懷聊效牛刀

式遂雞口顏而下則轅之門吏也自陳去職久困家食
俾佐方州各均祿仕而荷峻其階序飾以章服吾不能
無私於親親之道也可依前件

授沈正言南鄭縣令李登趙縣令楊守節永樂

縣令等制

勅宣尼薦弟子之能曰由也果於從政乎何有朕懲兵
革之後念疲瘵之人富而教之令長為急具官沈正言
等或納圖籍於書府或稱勞績於本官皆不因依明自

論列執政詳驗功狀昭然皆可謂果矣夫南鄭亞赤永樂次畿及晉之趙城皆名邑也俾爾各為之宰冀乎有成嗚呼無成果於自謀而殆於從政可依前件

授劉廷溫華原縣令丘景元分水縣令制

前人

勅華原甸服之重分水吳境之清宰宇至于屬僚不可輕往以廷溫在官有績罷退稍久景元侯表奏舉其才能資次命之各勤于職可依前件

授李昌偉岐山縣令王羣白石縣令杜莛曾口

縣令等制

勅昌偉等宣宗皇帝命明法吏刪刑書為統類十編盡去繁詞而獨著元結縣令箴其間是於養人之官殷勤深切矣岐山右輔之名邑固所重也而壁之白石邑之曾口委以養人之任豈以僻陋而輕哉以昌偉等勲臣所薦跡其勤効咸可寵嘉用爾大小等衆俾其並為令長噫風俗雖異戶口雖殊苟無忽於元箴則皆可副吾

旨矣可依前件

授盧蟾富平縣令郭諲武寧縣令李嗣業曲沃

縣令馮珙山陰縣令等制

勅盧蟾等十年兵戈兆人流散朕延執政與百執事問所以聚人之方皆慎選令長而已夫畿赤之富平可謂大邑而洪之武寧絳之曲沃越之山陰亦皆著名者也爾蟾等或稱華胄或曰才人華胄以禮讓為本才人以政術為宗而珙嘗於佛寺有遷明皇真像避賊火之功

可謂忠敬矣以爾四人為縣庶可聚吾人乎勉端爾能以稱其用可依前件

授孔競陰平縣令張標湖州錄事叅軍王振蓬
溪縣令等制

勅孔競等或連帥奏請或郡守薦揚或勞績可稱罷免
斯久能自陳列動我聽聞宰邑糾曹皆其任也可依前
件

主簿

授高昌首領守蒲類縣主簿制

李嶠

勅麴玄福拔跡輪臺策名會府宜受芝泥之命往叅蒲海之邑可將仕郎守北庭蒲類縣主簿

授鄭枋河中府河西縣主簿 白居易

勅鄭滑州觀察推官試太子通事舍人鄭枋材集作名列

士林職叅軍府脩身無闕從事有勞既展効於即戎宜試能而補吏俾之糾邑庶有可觀可依前件

授楊彥奉國縣主簿尚殷美萬歲縣主簿制

劉崇望

勅楊彥等主簿之官大要在其勾稽一同百里不亦難乎無言小官而忘幹事黜陟勸沮勉自為謀可依前件

縣尉

授侯丕壽州霍丘縣尉制
白居易

勅試太常寺奉禮郎翰林侍詔上護軍侯丕夫執藝以事上奉詔而處中其於出入謹身夙夜祇命比他局署

實倍恭勤既寵之以職名又優之以祿俸蓋先勞後食之義也汝其承之可守壽州霍丘縣尉依前翰林侍詔勲賜如故

魏兗二州所薦田夷吾曹璠二人準勅試詩日終百首授以所貢郡縣尉制

前人

勅乃者魏兗二帥以田夷吾曹璠並善屬文貢置闕下有司奉報明試以詩五言百篇終日而畢藻思甚敏文

理多通賢侯薦延宜有升獎因其所貢郡縣各命以官而倚馬貢來衣錦歸去以文得祿亦足為榮可依前件

湖州烏程縣尉李忠等授官仍量留等制

薛廷珪

勅具官某等青社雲溪之守各脩職貢俾爾來朝實冒險艱所宜酬獎有以兼廷評之命而許留於官有以移掌庾之秩而與夫掾臨海者皆遂爾畫錦之榮也可依前件

授張暮端陵丞李頊虹縣主簿裴昇新井縣尉

等制

李 頊

勅張暮等或園陵攝官屬籍吉士宗正以其事跡貢表
薦揚裴昇等各以去任在官勞績深自論列情有可依
丞簿陵邑各從資序可依前件

授宋郁廣都尉黃去惑臨安縣主簿顏溫鳳

翔文學等制

勅太宗文皇帝論學書骨力喻政化根源朕既達微言

則思觀真跡又欲廣書籍之府以正是非存忠烈之家
以勵風俗三者皆吾夢想也而宋郁等進獻論列有以
副焉丞簿文學用酬其意可依前件

文苑英華卷四百十五

欽定四庫全書

文苑英華卷四百十六

宋 李昉等 編

封爵

封公

封右武威衛將軍沙吒忠義邠國公制

李嶠

鸞臺清邊中道前軍總管冠軍大將軍行右武威衛將軍上柱國賓山郡開國公沙吒忠義三韓舊族九種名

家夙奉戎麾遂參文衛蕃夷豕荐虜騎蜂屯頻出奇謀
屢推凶黨昔臨鴈塞能羈縛馬之妖今拒狼河更翦奔
鯨之孽勤功允著誠効克宣宜酌矢石之勞用廣山河
之賦可封邠國公食邑三千戶主者施行

封致仕唐休璟宋國公制

蘇頲

門下養老乞言是謂侑禮建侯專國

一作德

因而有命特

進行前尚書僕射同中書門下三品上柱國酒泉郡開
國公致仕唐休璟才實王佐行為物範自綜理朝綱暮

猷揆政文武必濟義存簡冊公忠不回誠亮始終逮子
房休事廣德遺榮雖樂在黃金而慶逢蒼玉重其行賞
孰若優賢宜傳帶礪益增土宇可進封宋國公食邑三
千戶餘如故主者施行

封郭虔瓘潞國公兼食邑實封制

前人

黃門聞鼓鞞之聲者則思夫將帥裂土茅之賦者則念
彼勲庸右羽林軍大將軍兼安西大都護四鎮經畧大

使上柱國太原郡開國公郭虔瓘忠勇超倫智謨絕等
決勝千里懷孺子之兵符通知四夷有老臣之戎律往
者鎮于荒裔獨守孤城煇弩而其人益堅引弓而彼衆
不敵故得愛子染鍔名王解辮穹廬掃地而將空沙漠
聞風以歸附功則茂矣朕實體之宜誓河山開其井邑
可進封潞國公食邑三千戶仍賜實封一百戶餘並如
故主者施行

封李林甫晉國公牛仙客幽國公制

孫逖

門下勸賞者國之端既著酬庸之典俾彰為善之制中
書令李林甫天寶挺生鬱為良佐工部尚書同中書門
下三品牛仙客國之名器特表忠臣能協乃心以成大
政亟多啟沃聞所未聞導以化源驅之仁壽遂令天下
人盡知禁斷獄數十殆至無刑所以比跡於成康高步
於文景用人多矣方獲我心况知無不為釐革庶務損
繁取要無往不通古者褒有德賞有功今乃法懸不用

德教云洽叶贊之道功則茂焉宜其增封特開井賦林甫可封晉國公仙客可封幽國公主者施行

張均襲封燕國公制

門下正議大夫行尚書兵部侍郎上柱國張均傳範濟美錫履承榮有構厦之壞材為剌鍾之利器嗣其先職且歷縉雲之司纘乃舊封更開去社之國可襲封燕國公食邑三千戶主者施行

封侯

劉領軍封侯詔

沈約

門下南國是式事曷興周原鹿啓土義昭洪漢領軍曷
親德之重朝野式瞻在昔中興任推心膂哀疚眇然未
堪多難允賴徽猷嗣隆寶業及釁起不虞咫尺宮禁內
叅嘉謨外宣戎畧密勿劬勞誠力備盡宗社克固寔倚
高謨無言不讐無德不報况忠勲至戚義兼於此者乎
宜錫圭裂壤允副僉屬可封開國縣侯食邑二千戶主
者施行

王亮等封侯詔

門下尚書左僕射亮中領軍南鄉侯南徐州大中正瑩
守吏部尚書志並時宗民秀徽望允集協贊朝機彛倫
是寄秉文經武任惟腹心方賴嘉謨克弭時難宜䟽爵
建社與國同休亮瑩可各封一千五百戶開國縣侯本
官中正如故志封千戶開國縣侯本官如故主者速施
行

常僧景等封侯詔

門下廬陵王中兵叅軍事宣閣將軍軍主新除右軍常
僧景車騎江夏王叅軍事宣閣將軍新除右軍中郎將
薛元嗣安東廬陵王叅軍事振武將軍徐元稱假寧朔
將軍廬陵王國侍郎延明主帥殷係宗前軍將軍宣閣
格虎隊主馬廣或氣畧強果或志識貞濟或忘家奉國
誠著夷險方寄戎昭克清時難宜命爵啓土以獎厥勞
可封一千戶開國縣侯本官新除驅使悉如故主者施
行

封李岫長樂縣侯制

孫逖

門下朝議大夫守衛尉少卿上柱國清水縣開國伯李岫操清行潔學敏詞優克荷教忠之訓以成資敬之德屬交神有慶布澤無偏賜級之榮既覃於良相推恩之典宜及於名卿俾增錫土之封用表傳籙之業可封長樂縣開國侯食邑一千戶主者施行

授魏博節度副使守左

一作右

司馬知府事長沙

縣開國子羅紹威檢校司徒進封開國侯制

錢珣

勅王制之重列爵惟先開國之名徹侯斯貴具官某自
河而北地濶兵賦之大實在鄴中而又以雄傑之材統
臨有政爾以忠孝全道副貳其權嚴訓所資美譚甚遠
不作威而人自畏能處順而事必行理戎每贊於公家
秉禮無違於私室更廣䟽封之寵以分勸善之章勿怠
象賢是為守貴可依前件

封伯

封申希祖詔

沈約

門下持節督司州諸軍事冠軍將軍司州刺史申希祖
志器沉隱才畧開濟在昔多難任叅心膂爰及中興忠
款彌著契濶艱虞盡其心力逮獯獫侵斥武節颺騰殘
寇外殄危城獨困休庸茂績朕有嘉焉宜錫茅土以酬
勤烈可封開國伯食邑五百戶本官如故主者施行

封三舍人詔

門下輔國將軍驍騎將軍南高平太守兼中書通事舍

人沈徽孚給事中驍騎將軍臨淮太守兼中書通事舍
人王咥之寧朔將軍南濮陽太守兼中書通事舍人裴
長穆並以素胄清才服勤禁省契濶劬勞自頃多難軍
國務殷內叅帷幄外濟師旅忠規欵志義感朕心宜錫
茅社同莅賞冊可封三百戶開國縣伯本官郡驅使並
如故主者速施行

封子

封徐世標制

一作
詔

門下驍騎將軍彭城令徐世標才畧貞濟志懷義烈忠
節內款勲勤外著禦侮折衝任惟心膂頃姦慝潛煽危
機驟發夷凶弭難實有力焉宜命賞疇庸錫茲土宇可
封開國縣子食邑三百戶

封烏薄利歸義縣開國子制 李 嶠

鸞臺左金吾衛大將軍員外置檢校源州都督烏薄利
家近圓城任隆方岳惠洽藩部功宣朝廷扶津構虐遂
穴生氣能拒袂凶固守臣節踰馬韓而獻冊汎鯨海而

申虔計議並深忠懇咸到書勞有典方隆將帥之班舉善不遺宜拓公侯之宇可左金吾衛大將軍員外置同正員仍封歸義縣開國子食邑一千戶主者施行

授高爽果州刺史安友晟寧州刺史仍封武威

縣開國子加食邑制

錢 珣

勅我思致理不欲滯人復於賦祿之間常有失勞之慮改張之道且就便宜勸善之章必先允當具官高爽周知武經盛著臣節拳勇之力馳騁有成前以新平殄寇

之勲移北地頒條之政而茲之牧守且務緝綏元帥請
留我所難奪南充善部皆曰可居雖改乘轅將聞叱馭
具官安友晟兄友弟恭共圖富貴披堅執銳惟徇國家
當羣克効逆之秋激受命忘身之氣比膺賞典亦剖郡
符且未登車實同解印或致杜門之歎是忘盟府之書
乃寄邊城仍加列爵爾其各宣美化如立前功必使忠
臣兼稱循吏可依前件

授金州刺史馮行襲學校太子少保仍封長樂

縣開國子加食邑制

勅漢制郡國有政者皆不易其居就增其秩欲使人安於教化且激勵精本自凋劑皆成富庶具官馮行襲始用忠謀勇力披難立功每推求敵之心必能禁暴為武思齊良將閤合善經而負山面江金石名部燎于兵火毒我編氓爾則保之如家視之如子盡寬井賦恐奪農時耕無惰失廩有豐食地產脩述職之貢市租給備患之師相里所而同欲乃遷興役徒而施勞何怨炳然之

績觀而可論保民既重於三公開國仍昭於五等如能
知勸當更陟明可依前件

男爵

授李居壬等制

沈約

門下新除太子左衛率軍貞主李居壬志識開敏器懷
貞濟盡力禁門誠著夷險新除太子右衛率軍主潮陽

齊書作
山陽

縣開國男胡松性業詳固才用果烈新除節督

青冀二州諸軍事寧朔將軍青冀二州刺史栢和剛正

欵率屢著勤効新除左中將軍主鴻選氣質強果秉心
壯宣並反旆南轅以赴危難身先士卒翦此鯨鯢功勤
碩茂宜隆賞典居壬可封一千戶開國縣侯松可增封
為七百戶和可封五百戶開國縣伯選可封三百戶開
國縣男新除持節刺史將軍主男並如故主者施行

封左興盛等制

門下逆豎王敬則縱兵內侮陵斥畿甸輔國將軍參軍

將軍事

齊書作前
軍司馬

左興盛直閣

齊書作
輔國

將軍劉山陽受

律前驅焱勇爭路或衡至首旆或陷懸中麾元惡梟至
氛梗載廓賞不踰時義弘前典可封開國男食邑二百
戶井進位一階主者速施行

封劉璿彭城縣開國男制 李 嶠

鸞臺朝散大夫行左肅政臺監察御史劉璿執簡當朝
乘輅撫俗効彰伏柱勤深攬轡堅貞之操既申於栢臺
利建之榮宜及於茅社可封彭城縣開國男食邑三百
戶主者施行

授沙叱忠義等官爵制

鸞臺辭第鑿門允稱鼓鼙之將列位䟽爵是為廟堂之
賞冠軍大將軍行右威武衛將軍檢校左羽林衛上柱
國邠國公右奉宸內供奉沙叱忠義遼東壯傑名蓋於
狼河右武威衛將軍員外置同正員右奉宸內供奉駱
務整薊北雄渠氣高於龍塞並受登壇之任俱懷出閫
之畧或輕齋絕險以應青丘之別軍或高壘抗威以要
黑山之潛遁兵強由筭師克在和爰清食瓊之祆遂廓

浮竈之黨操袂成市執祛

一作驅

盈路屈指告捷未待於

經年酬庸冊勲豈假於踰月宜膺剖珪之錫兼峻銜珠
之寵忠義可行右金吾衛將軍餘如故務整可左武威
衛將軍封盧龍縣開國男食邑三百戶餘如故主者施
行

封張嘉貞河東縣男制

韓休

門下任事而爵古之彛訓論功以封朝之通典銀青光
祿大夫守中書令上柱國張嘉貞忠肅恭懿宣慈敏達

涵清明以毓德體文武而成器自光帝載昭宣廟謨鼎
味用和台堦增峻事君有犯而無隱奉國以公而減私
持其憲章式是軌度既邦教有叙亦王猷以穆頃統軍
政則城朔方爰底其績未酬厥賞固宜命以圭社崇其
禮物俾楚臣授邑克表寢丘之制漢道優賢更叶平津
之美可封河東縣開國男食邑三百戶主者施行

授寧州刺史高爽檢校司徒仍封渤海縣男加

食邑制

錢 珣

勅昔慶父去而魯難寧得臣死而晉憂弭事有所近之
類而人有可論之功則用典為以勸來者具官高爽魁
傑之材好通經畧強禦之力善據邊防激將帥之雄心
憤邦家之多事聞吾出狩來扞近郊遂驅有律之師進
討不然之黨壓卵既潰衝冠既一作始平忠烈可圖勲勞
甚盛進階以數開國有章且觀得衆情無不悅於是賞
勵之不已保則永休可依前件

文苑英華卷四百十六